

續修陝西省通志稿

第八十六冊

卷一百六十九

續陝西通志稿卷一百六十九

紀事三

平定口捻一

西漢趙充國陳兵事利害書有云帝王之兵以全取勝是以貴謀而賤戰又曰兵以計爲本故多算勝少算千古用兵之道營平數語盡之矣方有清咸豐同治間東南大盜起當宁皇皇計議趨重江皖楚豫之邦至於西北軍事未嘗不爲未雨之綢繆然經畫多疎委寄失當未有如辦理口捻軍務寡謀失算至於再三者遂致山南一道疊陷重城而河西上郡諸區亦復繹騷殆徧馴且會垣數困三輔頻驚命將出師擾攘歷十年之久而猶未能帖息民生之匱物力之殘至於今日不克復承平之舊嗚呼慘已推原其故滇匪擾川瑛榮建劍梓設防之議而請以福濟督師福濟固非帥

才即以衛漢中其算非失也乃朝廷聽崇實言謂劍門天險賊難
北竄不須防守孰知藍郭等逆竟從間道逸入興元此一誤也既
而漢南賊勢大張捻亦窺伺商雒多忠勇將精銳之卒一挫之於
荆子關再挫之於商南宜可赴援興漢而朝命忽令移屯鄂豫之
郊置雄兵於舒緩之地用是興漢並陷兇鋒且及西都此二誤也
南山地形蜀近楚遠巴渝之甲捷於襄鄖之師使駱文忠當日於
中樞詢統將時不以毛震壽李雲麟支吾而即疏舉周達武李輝
武其人者總旅遄征即仍以劉蓉將之而用軍法督促北上不使
遷延瞻顧興郡未必不全漢中亦何至待援如渴而卒潰敗決裂
不可收拾哉乃皆不然春秋責備賢者吾於文忠固不得不歎其
千慮之一失此三誤也至於同治五載捻酋入寇大挫我師灞橋
之戰湘軍燬焉誤於劉蓉之盡撤東防以禦西寇然其時陝軍亦

實不敷分布而蓉又以其恃才傲物之概氣凌其上頤指其下所用非人狃不肯易朝廷屢申告誡抗弗遵循卒以護惜楚材緩於罷斥釀成喪師辱國之禍失在舉棋不定措注非宜樽俎折衝旣莫操決勝千里之算指揮驅策復難爲調護諸將之謀昧多算少算之成謀寡將將將兵之大畧是則樞筦計謨視張文成李贊皇有愧焉而其咎不在疆臣閫帥間矣總厥得失備著於篇皤皤營平古今孰尙研兵畧者其得所歸

咸豐十年三月丁丑諭軍機大臣等有人奏陝西興安府屬毗連川楚咸豐六七年有自楚來傳邪教者不一其人隨地變易姓名有秦姓覃姓徐姓等人勸人吃齋念佛夜靜時演諸邪法信從者衆七年秋平利縣訓導史夢熊目擊情形曾經具稟本府經興安府知府林映棠委員查辦拏獲匪徒無幾管押數旬即行釋放未

經嚴辦習教者益無忌憚漸染至漢中府近山數百里比戶皆然
甄坪廳有段光耀等窩藏匪類搶劫民財暗置器械地方紛紛稟
報而署同知徐奎並不緝究前遇荒旱徐奎託名賑饑變賣倉穀
三千餘石約計錢一萬四千串至秋間豐收徧勒民間捐穀六千
餘石以填官倉復侵吞二千餘石反以半施半賣捐廉填倉稟報
上憲民間以其縱容教匪侵蝕倉糧形諸謠詠等語良民染習邪
教例禁綦嚴似此地方官一味姑容必致養癰貽患見在川省賊
勢蔓延倘與勾結爲害匪細著譚廷襄確切查明嚴拏懲治地方
官有縱容諱飾諸弊即行嚴參懲辦並將徐奎侵吞倉穀之案一
併嚴查究辦以儆官邪 己卯署陝西巡撫譚廷襄奏請挑練勇
八百名派員管帶赴漢中興安一帶防堵川匪奉諭該撫所請挑
練勇丁八百焉能敷用且一經官手百弊叢生總應民捐民辦寓

禦侮於自衛賊來固不容延玩賊不來亦足以靖奸宄所請派員管帶之處不准行 五月庚戌諭前諭河南等省辦理團練並令順天府府丞毛昶熙回籍督辦因念山東地屬海疆毗連畿輔陝西與川豫接壤均屬緊要自應一律辦理所有應辦事宜即著籍隸山東陝西在京大小官員各就地方情形直抒所見該兩省官紳中有名望夙著練達事務者並著各舉所知候旨派往該官紳等必知共體時艱助兵濟餉不但爲國家保守疆域亦可自衛桑梓實有厚望 壬戌諭前諭陝西等省在京大小官員就地方情形各抒所見籌辦團練事宜並各舉所知候旨派往茲據戶部左侍郎梁瀚奏酌擬辦理章程九條呈覽均屬可行陝西團練即派署巡撫譚廷襄督辦前任陝西陝安道坐補鞏秦階道陳晉恩著發往陝西與見任陝安道張守岱在籍候選知府馬百齡均幫辦

團練事宜按照所擬條款並參酌河南等省章程體察情形妥爲辦理 六月丁丑署陝西巡撫譚廷襄奏請陝省兵馬兼歸巡撫節制奉諭著俟樂斌抵陝與譚廷襄妥爲商酌若各鎮協以下均由巡撫節制其升調缺分兵馬錢糧有無違礙之處一併熟商不可各存意見務期有益地方籌畫妥當會銜具奏 七月癸丑諭據御史梁經先奏陝西刀匪回匪搶劫各案層見疊出該匪巢穴即在蒲富臨渭四邑之交二百餘里一片遼闊並無城池雖渭南之下邽鎮臨潼之關山鎮各設有縣丞職分卑小難資彈壓該縣等又以四邑交界互相推諉以致盜風日熾惟添設縣治庶緝捕責有攸歸下邽之地處四邑之中漢唐皆有縣治關山鎮亦尙有圍牆丞署若割四邑之地於該處改設下邽縣城修築較易而渭南臨潼兩縣丞即可裁撤至修葺城池衙署學校等項前有修華

嶽廟餘銀交商生息可以提取動用等語著譚廷襄察看該處情形是否可行並修築城池等經費有無窒礙之處詳細查明具奏

八月乙酉左副都御史張芾以補行守制請開缺回籍從之

九月辛亥諭樂斌奏遵議陝省各鎮兵馬兼歸巡撫節制一摺前因譚廷襄奏軍興以來徵調防堵多由巡撫籌辦平日無節制之權有事恐呼應不靈擬請量爲變通當經諭令樂斌會同譚廷襄妥商茲據樂斌奏擬請嗣後遇有征勦要務陝西各鎮協官兵均由該撫酌調仍咨總督查照各該營訓練操防亦令該撫就近稽查倘有廢弛及缺額等弊即行會同總督聯銜參辦其武職升遷調補稽覈糧餉等事仍由陝西提督移咨總督辦理若各鎮協將領中有人地不宜之處應令該撫咨商總督提督酌量更調等語所議尙無滯礙均著照所請行至請加提督銜之處著毋庸議

樂按

督所議僅准巡撫酌調稽查於
職銜中並無更易故不入兵制

十月辛未諭前諭直隸等省辦

理團練均已次第舉行茲據侍郎梁瀚奏甘肅地方緊要請飭一
律辦團並酌保官紳開單呈覽一摺甘肅壤控西陲地方遼闊且
與陝西四川毗連見在四川滇匪未清自應一律舉辦團練以靖
邊陲所有甘肅省團練事宜即著陝甘總督樂斌督辦並著甘涼
道蕭淩蘭丁憂刑部員外郎吳可讀江西候補道楊昇幫辦團練
咸豐十一年三月戊戌諭嚴樹森奏請飭張芾選將練兵並兼籌
全局一摺據稱江淮捻賊及各種土匪日肆披猖豫省軍務因循
疲弊請飭陝甘督撫會同張芾於提鎮各營精選馬步官兵由張
芾統帶來豫會辦防勦並募勇訓練等語豫省軍務積弊日深該
撫欲改弦更張實屬勇於任事惟陝甘各營兵丁歷年徵調頻仍
存營兵數無多該省與河南毗連處所現在需兵防堵若再調撥

必致完善地方益形空虛前已降旨令該撫督辦河南勦匪事宜
事權既一責無旁貸所有練兵選將事宜著即破除積習實力整
頓以期日有起色並就河南現有兵力妥籌防勦以副委任本日
已降諭旨令張芾幫辦陝西團練事宜矣 是日命前任左副都
御史張芾幫辦陝西團練事宜 庚子諭軍機大臣等瑛榮奏捻
匪計圖西竄添派官兵前赴商雒擇要駐紮一摺捻匪由老河口
回竄厚坡李官橋一帶逼近商雒該處隘口紛歧在在與豫境毗
連亟應擇要防堵著瑛榮即飭所調固原提標官兵及原紮盤頭
之西寧鎮兵迅赴商南交關不敏統帶同原存防兵妥爲布置如
該逆西竄逼近陝境尙恐兵力單薄應添派官兵助勦毋令竄越
至興安府屬之白河平利路通南陽及湖北光化等處亦恐有竄
匪闖入並著嚴飭陝安鎮及地方官豫爲防範相機堵禦惟該省

地方遼闊官兵勢難處處設防必須聯絡鄉團藉資守助前有旨令張芾幫辦團練瑛榮現署巡撫著即會同張芾趕緊激勵鄉團務令民兵互相保衛俾賊無隙可乘方爲妥善 二月己未諭軍機大臣等前因捻匪竄近河南省城並有乘隙西竄之意諭令毛昶熙嚴樹森嚴密防守要隘堵其西竄本日據勝保奏接據探報捻匪馬賊由北路突入朱仙鎮盤踞其大股已至蘆花岡省城南門曹門宋門均已封閉二月初一日朱仙鎮蘆花岡之賊均向省西之中牟新鄭等縣及老河口地方竄逸因而西門亦閉等語前據毛昶熙奏官軍分路迎擊捻匪九戰皆捷已派署總兵成景等由寧江一路鈔追見在賊逼省城勢更猖獗著即督飭帶兵各員奮力追擊儻遷延不進即查明嚴參至中牟新鄭爲山陝門戶見在賊蹤逼近難保不乘間西竄窺伺山陝擾及完善之區譚廷襄

已派兵在潼關商雒等處設防本日復諭令常績撥兵嚴防澤潞一帶著毛昶熙嚴樹森仍遵前旨分派兵勇迎頭截擊痛加勦洗逼令回巢並將西路要隘嚴密扼堵如賊勢西趨即會同山陝防兵合力勦擊毋令蔓延 四月乙亥命在籍左副都御史張芾會同陝西巡撫瑛榮辦理省城防堵 戊寅諭軍機大臣等據瑛榮奏川陝軍務督臣專顧川東逆匪李短搭搭等乘虛分竄川北探聞自梓潼至廣元一帶全無兵練防守陝西漢中府與蜀界毗連雖調派官兵出境嚴防惟賊衆兵單恐川兵追賊北竄逼入陝境請飭福濟酌帶兵官由劍州梓潼馳往迎勦等語前因回逆竄入黔省畢節縣境距川省甚近曾諭令崇實嚴飭地方文武實力堵勦並諭駱秉章抵川後或親往南路或分兵助勦見在李逆又擾及川北梓潼廣元一帶必須嚴密設防以遏北竄福濟著暫緩來

京即由劍州梓潼馳往防勦該將軍並未帶有兵勇著崇實迅撥官兵交福濟統帶駱秉章計已入川如兵勇可以分撥並著酌量調派以防川北一路福濟到防後即督軍迎頭截擊將李逆一股迅速掃除毋任竄入陝境又諭瑛榮奏四川賊匪竄陷江油之中壩場派兵防堵陽平關大安鎮並已飭署漢中鎮出境堵禦等語四川賊匪李短搭搭竄撲梓潼縣據瑛榮稱已令署漢中鎮總兵萬福挑兵一千名酌量情形前赴朝天關扼紮並咨經文岱派兵一千名候調見在該匪既竄至中壩場去陽平關大安鎮較近漢中情形喫緊所派防堵之涼州等營兵是否足數分布著瑛榮張芾妥爲籌酌並飭令萬福統帶官兵尅日前往朝天關會合川省兵勇實力堵勦其川陝毗連各要隘亦即嚴飭地方文武督率兵練實力防守毋令匪蹤闌入並著經文岱將備調官兵一千名配

齊軍裝器械認真操練如果情形比前較緊即行派委妥員管帶
馳往督兵堵勦河南捻匪時圖西竄潼關商維一帶仍須認真防
堵毋得顧此失彼 五月壬寅諭軍機大臣等前因滇匪擾及川
北梓潼廣元一帶當諭崇實撥兵交福濟統帶由劍州梓潼馳往
防勦並著駱秉章酌量分撥兵勇以防川北茲據福濟奏遵旨馳
往川北請籌調官兵等語藍逆大股圍攻綿州甚爲吃緊並分股
在潼川各場肆行滋擾潼川之賊又欲分股由太和鎮下竄保寧
順慶由葫蘆谿劉家塋直撲綿州見在北路德陽羅江綿竹安縣
小北路樂至鹽亭遂寧太和鎮地方處處有賊非厚集兵力痛加
勦洗不足遏其兇鋒福濟見須趕緊赴防所調陝西分紮寧羌駐
守之甘肅官兵五百名帶赴川北尙覺兵力不敷勦辦該將軍見
已分咨崇實駱秉章各撥兵勇二千名馳往勦辦見在川北情形

吃緊各路兵勇如何勻撥即著崇實如數派赴福濟軍營與所調滿洲官兵一千名協力防勦以清川北一路兼保陝西完善地方毋任將備等藉詞延宕致有貽誤賡章計已抵川所帶兵勇數本無多仍著酌量川東川北緩急情形設法兼顧不可稍涉拘泥福濟到防後先就見有兵力節節布置實力堵勦力保陝南川北地方毋任賊匪竄擾 六月辛酉諭前據福濟奏馳往川北勦辦滇匪計此時該將軍已帶兵由劍州梓潼進勦矣本日據崇實奏布置川北防勦情形賊情似難北竄毋須重兵防守並陝兵入川請仍由陝省動撥兵餉等語四川由江油赴陝小徑地勢險阻大路自梓潼即入棧道民皆貧苦無糧可掠劍關一帶皆屬天險但能據險遏截布置周密即可無虞駐防寧羌官兵入川不過數站福濟業已調往著即至劍州一帶扼要堵截其署川北鎮賡良所

調官兵及劍關防勦兵團均由福濟調遣總以力保陝西南路爲要所需軍餉據崇實奏川省庫欸支絀萬難支應福濟此次赴防已由瑛榮籌銀一萬兩應用所有福濟入川應需軍餉一切即由陝西撥解庶使餉項有著瑛榮務須妥速籌撥毋得推諉事竣即由陝西報銷以免牽混 丁丑駱秉章奏藍逆巨股竄踞川北綿州龍安一帶李逆巨股蔓延川南眉州嘉定一帶各號十餘萬零匪所在嘯聚黃淳熙見已陣亡請飭劉嶽昭兵勇仍行赴川奉諭軍機大臣等川省匪勢鴟張兵力未厚官軍統領乏人劉嶽昭見帶兵勇圍攻隨州著官文等體察情形飭令劉嶽昭管帶所部兵勇啟程赴川聽候駱秉章調遣毋稍遲緩 己卯諭軍機大臣等福濟奏馳抵陽平催調川省兵勇請派幫辦軍務籌撥餉需並據瑛榮奏陝兵未能悉數赴川暨遵籌福濟軍餉各等語本日已諭

令崇實將盧又熊勇丁催令迅速前進聽候福濟調遣矣滇匪竄擾中壩窺伺陝省福濟兵力尙單自以力保陝西南路爲要該將軍見已行抵陽平關著即於該處嚴密設防暫緩帶兵赴劍關一帶其黃壩驛等要隘即就見有兵力妥爲布置盧又熊等勇丁應於何處屯紮以扼滇匪窺伺並著妥爲調度俟此項兵到時福濟再行統帶前進福濟所調陝西官兵五百名應需軍餉著瑛榮遵照前旨於該省動撥支應其四川派出兵勇餉糈均由四川省供給以免膠葛前任提督孔廣順著准其調赴防所幫同該將軍辦理防勦事務經文岱控制階文各路未能前赴寧羌有備調官兵八百名著瑛榮張芾飭令迅速赴防即交孔廣順統帶毋庸另行派員福濟所調副將哈連陞等已寄諭樂斌飭令該員等迅速前往矣又諭前據崇實奏川北劍關一帶皆屬天險賊難北竄無須